

IZVJEŠTAJ
POSJETA DELEGACIJE PREDSTAVNIČKOG DOMA PARLAMENTARNE SKUPŠTINE
BIH JAPANU

Delegacija Predstavničkog doma Parlamentarne skupštine Bosne i Hercegovine u sastavu: dr. Denis Bećirović, predsjedavajući, dr.Milorad Živković, prvi zamjenik predsjedavajućeg i g. Mato Franjičević, poslanik u Predstavničkom domu, gđa Mirsada Bukarić-Kovačević, rukovodilac Sektora za međunarodne odnose i protokol i gđa Amila Žujo, prevodilac, na poziv g. Bunmei Ibukija, predsjednika Predstavničkog doma Parlamenta Japana (DIET) boravila je od 24-27.09.2013. godine u zvaničnoj posjeti Japanu. Tom prilikom upriličeni su sljedeći sastanci

- Sastanak sa predsjednikom Predstavničkog doma Parlamenta Japana, g. Bunmei Ibukijem
- Sastanak sa gđom Sadako Ogata
- Sastanak sa članovima uprave JICA
- Sastanak sa zamjenikom ministra vanjskih poslova Japana g. Minori Kiuichi-jem
- Sastanak sa članovima Grupe prijateljstva Parlamenta Japana za saradnju sa Parlamentarnom skupštinom Bosne i Hercegovine

Sastanak sa g. Bunmei Ibukijem, predsjednikom Predstavničkog doma

Suret delegacije Predstavničkog doma PS BiH sa predsjednikom Ibukijem i njegovim saradnicima je protekao u prijateljskoj i veoma prijatnoj atmosferi. G. Ibuki je uputio toplu dobrosošlicu BiH parlamentarcima i interesovao se za trenutno stanje i aktivnosti koje se vode u BiH. Istakao da su BiH i Japan imali periode ratova, ali da nakon svega aktivnosti treba usmjeriti u drugim pravcima, zaštititi životne sredine i ekologiji. Kazao da i oni u Japanu imaju manjine na sjeveru i jugu zemlje ali da su svi Japanci, i da dobro funkcionišu u tom pogledu.

Dr. Denis Bećirović je iskoristio priliku zahvaliti domaćinima na ogromnoj pomoći koju je Vlada Japana uputila BiH kroz realizaciju preko 200 različitih projekata u vrijednosti oko 400 miliona dolara. Posebno saosjećanje izrazio sa japanskim narodom zbog tragedije nakon razornog zemljotresa i pogibije mnogih Japanaca i katastrofe u nuklearnoj elektrani Fukušima.

Domaćinima čestitao i dobijanje organizacije Olimpijskih igara 2020.

Istakao želju BiH za intenziviranjem ekonomske saradnje sa Japanom. U tom smislu pomenuo i značaj projekata Nagoja-auto dijelova. Također naveo grane privrede za koje postoji izuzetna zainteresiranost za strana ulaganja na projektima infrastrukture, turizma, energetskog sektora, poljoprivrede, metalne industrije. Izrazio nadu da će Japan podržati euroatlanski put BiH, te podsjetio domaćine na važne sporazume za koje u BiH postoji veliki interes ali da se čeka očitovanje japanske strane. Dr. Bećirović je posebno naglasio potrebu daljeg unapređenja međuparlamentarne saradnje, te kazao da je ovo prvi bilateralni posjet delegacije PS BiH Japanu. Uputio poziv predsjedniku Ibukiju da posjeti Bosnu i Hercegovinu.

G. Ibuki je informisao delegaciju PD PS BiH onačinu funkcionisanja Predstavničkog doma Japana, napravio historijski presjek rada ovog zakonodavnog tijela, te dao objašnjenje da je pitanje Sporazuma za koje se pitao dr. Bećirović u nadležnosti Vlade Japana, te da će sa svoje strane poduzeti aktivnosti u cilju ponovnog informisanja nadležnih u vezi s tim.

Na kraju posjete, g. Bunmai Ibuki je lično proveo delegaciju Predstavničkog doma PS BiH kroz Parlament i pokazao salu Predstavničkog doma te govorio o načinu rada i glasanja.

Sastanak je trajao 45 minuta.

Sastanak sa gđom Sadako Ogatom

Ovaj susret je obilježila sentimentalna retrospektiva aktivnosti bivše Visoke komesarke UN-a za izbjeglice, njenim angažmanom, pomoći Bosni i Hercegovini u realizaciji projekata humanitarnog karaktera, uspostavljanju vazdušnog mosta radi dostavljanja potrebnih namirnica opkoljenim gradovima, kao i čestim posjetama Sarajevu i Mostaru tokom rata. Dr. Bećirović se i ovom prilikom zahvalio gđi Ogata na njenom nesebičnom angažmanu te iskoristio priliku i pozvati je da snagom svoga autoriteta da podršku ratifikaciji sporazuma između BiH i Japana te da BiH i Japan imaju dobar okvir za dalju saradnju, posebno ekonomskog karaktera.

Sastanak sa članovima uprave JICA

Sastanak sa vodećim ljudima ove organizacije protekao u rezimiranju dosadašnjih ulaganja JICE na području BiH ali i šire u regionu. Posebno su naglasili da stabilnost BiH znači i stabilnost cijelog regiona. Naveli da su trenutno angažovani na projektima uspostave harmonije među narodima i pomirenju, posebno u oblasti Srebrenice. Veoma mnogo su uložili u infrastrukturne i projekte rekonstrukcije, ali da su njihovi prioriteti buduće saradnje usmjereni na razvoj ekonomije, tj malih i srednjih preduzeća. Pomenuli turizam kao posebno perspektivnu granu privrede, obzirom na interes koji Japanci u posljednje vrijeme pokazuju za posjetu BiH. Predsjedavajući Bećirović je i ovom prilikom izrazio posebnu zahvalnost za sve što je JICA uradila u BiH, te naglasio da želi da posjeta delegacije PS BiH Japanu ima istovremeno i plitičku i ekonomsku konotaciju. Dr. Živković je uputio posebnu zahvalnost za infrastrukturne projekte u Doboju, gdje je JICA aktivno pomogla u izgradnji mosta, te informisao domaćine o predstojećem popisu stanovništva i značaju koji ima za stanovnike BiH.

Sastanak sa zamjenikom ministra vanjskih poslova Japana g. Minori Kiuichi-jem

U čast delegacije Predstavničkog doma PS BiH, g. Minori Kiuichi je bio domaćin radnom ručku. G. Kiuichi je objasnio da je njegova funkcija zamjenika ministra vanjskih poslova Japana vezana za razvoj parlamentarizma i unapređenje parlamentarne saradnje. Iznio lična zapažanja na izborima u BiH, prvim poslije potpisivanja Dejtonskog mirovnog sporazuma gdje je bio u posmatračkoj misiji.

I ovom prilikom delegacija Predstavničkog doma PS BiH se zahvalila na srdačnom prijemu, gostoprimstvu ali i sveukupnoj pomoći koju je Japana, kao drugi najveći donator, pružio u najtežim trenucima građanima i državi BiH. Dr. Bećirović je podsjetio sagovornika na interes BiH za potpisivanjem sporazuma o izbjegavanju dvostrukog oporezivanja, o trgovinskoj i ek. saradnji, o unapređenju i zaštiti investicija između naše dvije zemlje. Također je istakao i nadu da će pitanje viznog režima Japana prema građanima BiH biti aktualizirano, obzirom da je BiH ukinula vize za građane Japana. Razgovarano je i o evropskom putu BiH, o stranim ulaganjima i izgradnji bolje budućnosti za sve građane naše zemlje. U tom smislu je rečeno da značajnu ulogu ima geostrateški položaj BiH, kao most između istoka i zapada, gdje se ukrštaju vjere narodi, interesi. Također je istaknuto da u godini kad se obilježava 100-ta godišnjica početka Prvog svjetskog rata, narodi BiH žele poslati globalnu poruku mira. G. Kiuichi je je pojasnio da o sporazumu o vizama odlučuje pravosuđe Japana (sigurnost i unutrašnji poslovi), pitanje sporazuma o izbjegavanju dvostrukog oporezivanja na čekanju, ali da su japanske kompanije mjerodavne u izražavanju interesa države u ovom segmentu.

Sastanak sa članovima Grupe prijateljstva Parlamenta Japana za saradnju sa Parlamentarnom skupštinom Bosne i Hercegovine

Sastanak sa članovima Grupe prijateljstva Parlamenta Japana je bio izuzetno srdačan, konstruktivan i informativan, obzirom da je postojao interes od starane japanskih parlamentaraca da se saradnja sa PS

BiH učini plodonosnijom i sadržajnijom. Ova grupa, osnovana 2008. godine, broji petnaest članova, ponovo je reaktivirana prije nekoliko mjeseci i čine je veoma respektabilni članovi :g. Nobutaka Mačimura, član DIET-a (Predstavničkog doma), bivši ministar vanjskih poslova, g. Ihsawa, zamjenik predsjednika, gđa Micušima, jedna od najvećih aktivistica vladajuće liberalne partije, g. Kiši, (brat japanskog premijera Šinzo Abe-a), g. Minoru Terada, poslanik iz oblasti Hirošime i drugi koji nisu krili zadovoljstvo susretom sa prvom delegacijom BiH parlamentaraca u Tokiju. Iskazali su zavidno poznavanje prilika u BiH, u svim sferama života, od političkih, kulturnih i posebno sportskih dešavanja.Izrazili spremnost i nadu da će Grupe prijateljstva biti nosioci mnogih aktivnosti koje će unaprijediti parlamentarnu ali i druge vidove saradnje između BiH i Japana.Većina članova Grupe prijateljstva Parlamenta Japana je već boravila u BiH, poslovno ili privatno i s oduševljenjem su pričali o utiscima , susretima s ljudima, hrani, prirodi. Članovi delegacije PD PS BiH, g. Bećirović, predsjedavajući, g. Živković, zamjenik i g. Franjićević su informisali japanske kolege sa mnogim specifičnostima našeg društva, političkim procesima, evropskom putu, popisu stanovništva i drugima, te izrazili zahvalnost na toplom prijemu u Japanu. Uputili poziv članovima Grupe prijateljstva Japana da posjete BiH.

Izvještaj sačinila:

Mirsada Bukaric-Kovačević

- Kolegiju Predstavničkog doma PS BiH
- Ministarstvu vanjskih poslova BiH
- arhivi